



LVdovicus ex honesta familia Berorum Basileæ natus atq; honestè educatus est. Is cum fœlici ingenio esset præditus, in patria bonis literis operam dedit, & præclaram sibi eruditionem comparavit. Postea sese Lutetiam ad celebrem Europeæ Academiam contulit, & Theologico studio magna diligentia incubuit. In eo quoque adeò profecit, ut Lutetiæ magno omnium applausu Theologiæ Doctor crearetur, atq; ei primæ partes in promotione attribuerentur, id quod hæctenus uix ulli Germanorū in eo gymnasio concessum erat. Cum hoc modo legendo & disputando sese plurimùm cum Sorbonicis exercuisset, Anno 1513 in patriam rediit, atq; cum aliquoties Theologiæ Decanum egisset, postea Collegij S. Petri Præpositus constitutus fuit. eam functionem is summa modestia administravit, atq; honestis moribus cleri ornamentum extitit. Cum etiam Badenis disputatio anno 1516 esset orta, ipse pro Catholicis præfedit, atq; omnium ora in se conuertit, & in primis Erasmo familiaris extitit. id quod ex eius Epistolis patet. Hac ratione cum perseueraret, atq; interea religionis mutatio Basileæ fieret, Ludovicus anno 1529 patria discessit, atque Friburgum Brisgaudiæ petiit. Ibilegendo & scribendo se talem exhibuit, ut eius loci Academia huius uiri præsentia plurimùm illustrata fuerit. quin etiam cathedralis Ecclesiæ Basiliensis (quæ tum Friburgum concesserat) Canonicus, & postea quoque scholasticus electus est. Scripsit is librum De præparatione ad mortem, præterea in aliquot Psalmos commentaria. quæstionem etiam illam, an tempore pestis Christiano fugere liceat, doctè tractavit & edidit. Cum hoc modo sua eruditione magnam sibi autoritatem comparasset, tandem postridie Aprilis senex obiit, atque Friburgi in primario templo honorificè sepultus fuit, anno Domini millesimo quingentesimo quinquagesimo quarto, cum hac lapidis inscriptione, quam anno salutis 1565 in mea peregrinatione inspexi, & huc subijcere uolui.